

08/09/2003

Fasa kedua kempen banteras keganasan terhadap wanita

KUALA LUMPUR: Kementerian Pembangunan Wanita dan Keluarga akan melancarkan fasa kedua Kempen Organisasi Wanita Membanteras Keganasan (Ombak) berikutan kes keganasan terhadap wanita semakin meningkat.

Kempen itu adalah kesinambungan yang dilancarkan Perdana Menteri, Datuk Seri Dr Mahathir Mohamad pada 23 Julai 2001.

Menterinya, Datuk Seri Shahrizat Abdul Jalil, berkata sehingga Mac lalu statistik menunjukkan 400 wanita dirogol, manakala 105 lagi dibunuh.

Katanya, kira-kira 1,500 kes wanita dirogol direkodkan tahun lalu, berbanding 1,200 kes pada 2001.

"Kita perlu mengadakan lebih banyak kempen kesedaran seumpama bagi membantu mengurangkan bilangan kes serta kadar jenayah terhadap wanita," katanya pada Seminar dan Bengkel Bela Diri Aikido untuk Wanita di sini, semalam.

Teks ucapan Shahrizat dibacakan Setiausaha Politiknya, Rizal Merican.

Kira-kira 200 peserta menyertai program yang dianjurkan Persatuan Aikido Malaysia (MAA) dengan kerjasama YZ Alliance Group Sdn Bhd bertujuan meningkatkan kesedaran wanita untuk mempertahankan diri daripada menjadi mangsa keganasan.

Turut hadir, Raja Puan Muda Perlis, Tuanku Lailatul Syahreen Akashah; Pengarang Eksekutif (Projek Khas dan Berita Minggu), Hafifi Hafidz; Setiausaha Agung Kehormat Majlis Olimpik Malaysia, Sieh Kok Chi dan perenang maraton negara, Datuk Abdul Malik Mydin.

Shahrizat turut menggesa wanita melengkapkan diri dengan seni mempertahankan diri supaya dapat menangani ancaman keganasan.

"Kebanyakan kejadian rogol, sumbang mahram dan bunuh sering membabitkan wanita yang secara umumnya tidak terdedah kepada aktiviti mempertahankan diri apabila diserang," katanya.

Sementara itu, Pengurus Eksekutif YZ Alliance Group, Raja Royani Raja Ahmed Siffudin, berkata program itu bertujuan mendedahkan wanita mengenai pentingnya seni mempertahankan diri dan kesedaran pada masa kini di samping menyebarkan maklumat untuk menghindar keganasan dan bijak menjaga diri.

"Usaha ini tidak akan berhenti di sini saja dan kami akan menganjur lagi seminar sebegini dengan kerjasama polis dan Kementerian Pembangunan Wanita dan Keluarga," katanya.

Seminar sehari itu turut mendapat kerjasama polis yang membentangkan kertas kerja.